

千
山
詩
集

千山詩集卷十六

博羅剩人可禪師著

七言絕二

贈友人十二首

愁生白日恨餘暉
夜夜披霜舞綵衣
莫道夢歸全不當
一年一半近庭闈

長讀金剛一卷經
經聲繞罷暗叮嚀
生還菽水無他願
雙白看兒到百齡

兩世持衡淡有餘
傳家只有一樓書
年來方識全無用

那得神仙到白魚

伯夷大笑入重泉先代弓裘頸血濺自是吹簫相和切
又看一鴈度寒邊

歲歲空看塞鴈歸何曾一見寄來衣遙知香閣無窮淚
出到堂前不敢揮

寥寥幾字寄空箋道是平安淚亦漣常恐未能癡且魯
偷將紙筆續殘篇

一杯濁酒奈愁何盡日看天自放歌衣上密縫還是舊
淚殘風裂已無多

含淚題詩不敢悲春風應見鴈參差山河異昔休輕問

夢裏曾經汝自知

獨有聲音不改初想當細認淚盈裾呼兒開閣應滿
簡點當年舊著書

幾年燈火伴僧孤香燼衾寒水一壺他日鹿門山上夢
又應夜夜到邊隅

華表還將老鶴羈先分一羽莫遲遲何時把臂山陰道
贈我前朝竹一枝

相知惟我淚難乾三囑殷勤曉露寒便是羊裘容易識
十分珍重釣魚竿

九日左公招郭北登高

籬邊不見菊花開
門外時聞慧遠來
萬里風沙愁黯黯
相携莫上望鄉臺

贈海城王令公五首

三年前此飄花雨
今日來看一縣花
舊戶新氓俱乞遍
一瓢直入到公家

衙齋如水小窓虛
一局殘碁一卷書
未見便知非俗吏
祇疑丁令舊仙居

天明野外勸農回
又向城頭開舊萊
纔欲關門看宋榻
忽聞吏報老僧來

不嫌粗糲分僧鉢
竹院過尋日日閒
更欲論詩情未懶

幾回騎馬入深山

鳴琴關鎮曉風清
携得絃歌遍海城
父老豈長看畫錦
中原最苦是蒼生

陳令公重招不往

重招野老了殘茶
竹杖將行又故遲
不是歲光驚燕怯
暑寒如水病難支

重入山寄木公二首

千丈秋巖錦十層
去年著屐憶同登
只茲一點清閒事
除却先生便不能

塵世青山隔幾何
高人只可一來過
不知老衲修何福

隨意烟嵐日夜多

至日雪

見說陽回何處覓山山惟有雪風狂幾多束手茆簷下
又見愁添一線長

寄壽大公

山塞惟予在汝先年年酌水獻詩篇天心只愛文章老
那管長愁幾百年

龍牙寄大公

山中何事苦相思共是寒風君最饑鉢底分將山味苦
幾年嘗盡自應知

山藥寄木公

淡中滋味少人知，帶雪鋤來寄所思。
爲語鄴侯須領取，懶殘斫額已多時。

大翁携來諸物俱典盡各賦一絕

一曲拘幽心已悲，高山流水尚相隨。
年來絃斷桐俱爨，十指空留向子期。

琴

一幅長懸萬壑秋，草堂閒臥共僧遊。
巨源一去雲山盡，雪滿泥傾破壁留。

畫

一片寒巖袖不離，雲霞隱隱舊家遺。
馬肝食盡愁鸛鶴，拾得殘磚寫舊詩。

硯

謾傳樵李千金值燕市相逢識者希
今日風流無晉代更搜殘墨換鵝歸

法帖

寄荅曰廬諸子

書來知汝未曾離竹杖麻鞋好護持
我罪已深衰更甚不須翹足看松枝

寄麗和尚

人天翹首嶺雲空又向匡廬覓舊叢
杖底瀑飛三百丈好携一滴洒遼東

荅浪杖人

憐兒不覺鬢毛殘幾度音來泪未乾
懷裏有香頭有雪

燈花應照海波寒

謝江南諸友寄筆墨

肯怯層冰骨已殘
獨愁破硯泪難乾
憑君寄我如椽管
寫盡天山百丈寒

笑峯兄受杖人付囑以書來并寄諸刻

石頭風雨共朝昏
萬里音書度玉門
雲月是同溪不別
更驚一吼海瀾翻

馮兄來言龍公入城同木公心公寓時心公得子

口占

客言星聚塞烟微
青瑣花磚共土圍
夜半呱呱驚夢醒

却疑白板舊黃扉

心公移寓木公舍得子二首

舊宮深鎖土牆低
書卷荒涼俎豆泥
見說北郊夫子在
三遷直向雪邊棲

相依廡下朔風吹
更截牛衣爲褰兒
想得高堂寒夜夢
撥開深雪自含飴

木公書來極言乾公近狀同難蒙福誌喜

白晝輕裘度玉門
鬚眉耿耿暗聲吞
此行不爲鄉情重
携取春風散五原

賀孝公被撻二首

獄吏何妨溺死灰獨將鷄肋抵轟雷翻嫌昔日王孫餓
寧受尊拳不受哀

何人雪底縛袁安不用攢眉且自看總爲梅花消息近
又添徹骨一番寒

馮公昌雪入山同臥

不負崎嶇路幾千歌聲哭語雪中眠自言到此今經歲
一夕真當勝十年

生日碧師見訪

蕭蕭匹馬扣山扉不用開言我自知空見雨花堆滿跡
一瓢寒雪共支饑

贈梁公

曾向蒼梧恐百蠻十年彳亍髣毛刪獨支破竈炊殘雪
雙袖還留帝女斑

呈羸

憐我長將病骨駝難隨冀足度關河生芻一束兼孤鉢
累子人呼乞食羸

寫詩寄同難

見說殘冬望我來老僧一見笑顏開寄君一卷新詩句
每到愁來讀一回

看花

春色蒙頭過去休，偶隨山鹿樹邊留。
年年花發無心看，不似今年花更愁。

燕銜花

今年寒甚去年寒，春雪纔乾花事闌。
燕子似憐人不見，故銜一片到蒲團。

落花十首

片片何因再上枝，可憐搖落始應知。
老夫無限傷心淚，只在東風第一吹。

莫向枝頭頃刻論春光，一籌付與園紛紛。
紛紛開落無窮恨，只有青松自感恩。

倚仗穠華最可憐牡丹畫就亦徒然燕支山有傾頽日
未必紅顏保百年

未曾衰謝斷人腸杓折何因委道旁却憶入時情漫切
鏡臺從此恨睂長

何須洒淚向空枝狼藉蒼苔苦不辭細想芳園繁茂日
由來不是別風吹

桃李春深自不言肯教他樹更承恩于今金谷多荒棘
不及梅花別有村

琥珀纔傾日已西夜來風雨暗淒淒曾將歌舞承歡宴
敢惜春泥踐馬蹄

亂點欹崖自不平一番雨過一番情誰能把得春光住
莫怨樓頭羌笛聲

鶯啼漸急如愁別剩葢殘枝日又昏野老不知春去盡
猶將杯水奠花魂

翠袖紅牙與尚饒蜂愁蝶散自今朝年年榮落尋常事
識得春風恨便消

重哭左吏部八首

思君不見草萋萋日落雲黃望轉迷未必冥途風景異
定知到處有新題

歷盡冰霜去不妨從今無復歎冰霜多年親友能相見

何異生還到舊鄉

兄弟團圓近若何應知同和采薇歌不須更話寒邊事
話到寒邊恨更多

生前有淚三千斛一見流人一度揮地下若能開別路
好呼殘魄盡將歸

飄零雲水足深悲最是無情淚獨垂人世悠悠知不問
夜臺何處訪相知

不須重擬問高天寫盡長空也枉然白日未曾聽半句
千今又隔幾重泉

如君可是忘情者屢問曾無答一言果爾不虛南面樂

招辭先擬到空門

風沙漠漠竟何之靜想撚鬚不語時道大莫嫌泉路窄
山鐘佛火好相依

重過山寺看芍藥

昨日來看朵朵新今朝幾片逐飛塵無情無恨還如此
休問花前墜淚人

聞赤公扶病登山有懷二絕

自笑居山懶入山山花山鳥任閒閒
輪君抱病仍扶杖歷盡溪流第幾灣

山高霧重更多風到處崎嶇路不同
片石短松須歇足

莫于峯頂哭途窮

赤公同諸公遊千山余不能從二絕

年少探奇逸興增杖頭常欲上雲層于今老病居人後
見說峯高便畏登

險阻曾經百念輕半瓢隨地足平生不須重話塵中路
縱是名山也懶行

示老馬十首

日行三萬猶嫌緩便到瑤池路亦窮年老力衰甘處後
任他逐電與追風

萬仞崇岡還易上人間最險是平康若能步步如初步

歷盡羊腸也不妨

城邊有路荆榛滿山上無塵虎豹多健步縱留何可騁
不如隨意選陂陀

汝羸我病合相憐山寺晨鐘自在眠赤汗已乾蹄已薄
長楸無復憶當年

渥洼久已無消息皮骨雖存志欲灰舊日驍騰如夢裏
莫教錯認作龍媒

惠養雖勤非素願菱芡苜蓿總堪羞但能不受黃金絡
雪磧荒阡亦自由

幸無伯樂能垂顧價重何曾老不才青草漸長溪漸溢

騏驎終欲羨駑駘

却恨當年白馬來
驂騑遍地轉堪哀
支公久已輕神駿
只合埋頭向草萊

不遇子方誰肯贖
雖然出塞不從軍
龍鬚鳳臆皆黃土
日暮臨風哭舊羣

錦勒絲纏萬騎奔
駢駢狂狂若雲屯
何時盡放華山去
豐草長林到處恩

咏花六首

一接春光卽便休
莫于花底更淹留
從他爛漫從他落
只恐風來覲面收

空枝相對慙清幽誰把繁花綴上頭爲囑狂風索吹盡
莫留殘蕊向人愁

豈有紅顏能久駐空庭應自長離憂無端老衲花前去
分取春風一半愁

相看到得日斜無只恐叢空眼亦枯蝶死不知花是夢
林鶯何必苦招呼

風光撇眼我明知花信頻來暗自悲二十四番腸寸寸
安能更見楝花吹

嫩蕊終當委草萊漫勞狂雨強相催空門不染猶生感
莫向朱樓綺閣開

贈采郎

古錦爲囊背不離
詞臣疏草逐臣詩
閒同覓句來山頂
逢著山僧一局棋

聞蠡雲師有詩相寄未到先有此荅

詩筒聞說寄寒邊
憶別今經十六年
窖底雪深埋未了
餘魂飛向玉簾泉

和赤公韻

歲盡風吹事事無
閒拈楮袖自添爐
山中松樹枝枝雪
莫壓城西那一株

初春

誰識山中別有春梅花爲夢草爲茵更餘布袋殘書卷
不恨身貧恨道貧

雪中同阿字讀柱江燕歌

雪底燕歌不可聽千峯不見一峯青幾年心著寒灰死
敲碎他家老瓦瓶

憶故山梅

不如此地雪花多月落村頭可奈何翠羽無聲魂已碎
夢中蝴蝶淚成河

題心公寄畫山水

筆纖料得全無意短短枯枝淡淡山細想江南何所似

二言集 卷十二
蘭陵端不是雲間

題謙公寄畫梅

美人贈我一枝梅
嶺上曾過十七回
騎馬路邊香不了
斜陽石壓倚巖開

題天公寄畫山水

身在山中不識山
何人潑墨寄柴關
雪深最好無蹊徑
竟入長松大壑間

栖賢先專普雨來
及聞而返今冬阿
字始至戲成

二絕

嶺嶺低塚路茫茫
普雨何曾及大荒
怪殺羸軀兼善病

竟將草屨試冰霜

雁足先傳紙半張十年窖底伴羝羊
栖賢門下多龍象蹴踏都應白玉堂

戲似阿字

只將匡嶽紙三張此外何曾半辦香
江月江烟兼塞雪等閒收拾滿空囊

心公書來寄乾笋一觔不到天公書
來寄乾笋一觔半又不到戲成

十載檀欒夢不成此君雖死怯山行
自憐福薄甘心餓猶幸書來兩見名

阿字破袋中見澹歸書有行不得哥哥語戲成

曾于天外寄空音忽聽連啼烟水深磧雪果然行不得
瓶塞辜負十年心

和栖賢中秋無月二絕

雪晴夜半冷雲開缺月疑從匡頂來招隱泉邊應未臥
遙知兩地各徘徊

似此如何得好懷夜寒泉石亦難諧却憐金井橋頭影
定是吟詩憶海涯

起西以長篇寄訊荅此短章

白門風雨讀僧詩夜半鐘聲動遠思布袋裝來千斛淚

報君欲語已無辭

和歸宗蠡雲師寄韻

尺幅三年到遠天
泉聲和淚落風前
何當剪燭松堂上
讀盡離憂幾百篇

偶成

日日空山一卷書
行吟孤坐外無餘
清風寺裏僧來到
說道明朝是歲除

五更大風至旦晴明誌喜

積露寒沙一霎收
天恩如水向東流
愁心吹入關門盡
一片殘雲也不留

元日山中寄同難諸老

不恨投荒我獨先春風應滿塞城邊
相將半揖辭冰雪莫憶寒雲壑底眠

送屍林

六載寒沙共耐饑臨行雙泪尚依依
片雲莫道無歸處好向老人峯上飛

寄荅禪人二偈

西風吹送越江吟百斛梅花散遠林
撲鼻是香無覓處漫拈片雪報高岑

一官侍晨昏尚有招辭及遠魂門下三千那不愧

幾人真感信陵君

送阿字遊醫巫閭二首

杖歷千山意未舒，又將望海上巫閭。祗疑絕頂雲封處，

猶有東丹萬卷書。

東丹王藏書絕頂望海堂

嵯峨十載夢魂間，羨汝逍遙一笠閒。若到遼東讀書處，

秋遊好續幾篇還。

良讀書此山有秋遊賦

聞阿字諸子改從海舶還

草鞋脫却任乾坤，日淡雲黃海氣昏。縱遇神仙休眷戀，

乘風直向虎頭門。

遣諸子行後二首

幾年無復聽鄉音一聽鄉音淚更深收拾鄉音擔去盡
不教細碎動予心

東林尚不展家書況是流離萬里餘從今莫管南來雁
萬壑千峯意自如

夜雪

夜寒無那自開扉天地冥冥靜有輝莫學當年梅子咏
恐他持去織弓衣

雪中懷阿字

雪裏題詩汝最多汝行雪裏奈予何只今乞食長安市
更向誰人慷慨歌

懷侍者

從師出塞一年期幾度山前暗淚滋
知爾舊鄉情倍切
夢中白髮兩垂垂

譚家庵

何處山門八字開城西咫尺白雲堆
但逢榔栗橫擔者
定是譚家庵裏來

恥若新居成

何曾離却一步地泥竈柴門色色新
四壁任教塗白雪
蕭然仍是去年貧

允中老僧入山過冬

歲暮不知何處宿深山雪底共圍爐不因滿眼兒孫好
那得孤身伴老夫

恥若聞十慧龍諸子入山

山前大路久荒蕪況復連綿雨雪鋪莫道有鄰寒始見
長松頑石盡吾徒

遙哭黃无咎

當年結束九江行無柰當年詆牘情最是金多難贖命
何如孤跡任飄萍

謝因翁寄夏衣

五月披裘自采薇故人何處授輕衣無端惹得薰風動

拂盡黃沙白日暉

與季心雪

聞尋冰雪出邊陲一局殘棋一卷詩
吟罷便愁田海換何須更待爛柯時

金壇山居雜咏二十首

長夜鷄聲迥不聞寂寥古壇與平分
却嫌窗外晨鐘動猶帶寒風鬧白雲

月出開關晝掩扉山上人間事事違
最是欹崖連屋角一番下雪一番飛

端坐泥牀何所爲雪晴日影上高枝
山麋野鹿全無禮

來不叅堂去不辭

雲散鶴飛何所止
殿臺散木長橫枝
閒尋舊日經行處
荒草猶眠半截碑

曲木爲梁草作簾
我來又蓋半間添
蒲團以外惟茶竈
瓦礫燒泉味亦甜

孤松如蓋碧萋萋
流水還餘未凍溪
窮到生臺無半粒
饑鳥帶雪向人啼

耕田博飯不須貪
但看廚烟勿教斷
今年種麥本無多
野雀公然分一半

莫言山裏絕無朋
漸住雲間幾處僧
八歲沙彌頭帶笠

驅牛一直上高層

一個小麕相得甚穿林度壑必相隨自從老衲下山去
竟過西峯更不回

山南父老扣柴扃世利誰云遠翠屏一斛細糧錢一串
請僧爲轉法華經

見說遼陽諸弟子重重積雪盡衝開無非只畏山僧餓
個個懷將山藥來

山菜青青莫辨名暫時同遂隱山情驢蹄狗脚憑呼喚
不羨龍鬚得好稱

雪裏何人擔布袋沙彌望見笑聲譁昨宵好夢頻頻見

定是新城道士家

銅鑪豈必施家鑄木几中央照眼輝
沉水夢虛黃熟斷鋤將高本一籃歸

斫柴燒炭無多路夜夜圍鑪儘意烘
更傾半盃山梨汁九十老僧滿面紅

九十老僧被破衣獨行鎮日敞荆扉
遙看扶杖從橋過知是河東乞食歸

何人繫馬厓邊樹信意登臨水一壺
山鼠分餘堪共飽人間禮數本來無

要住只須瓢一半要行只須竹一條
山中迥古無賓主

自來自去亦蕭蕭

蔬水古來稱大聖
栖栖卒歲亦何爲
深山一段孤寒樂
不到深山總不知

住山須帶住山骨
山情自合宜世間
多少英雄漢
縱到深山也不知

聞作磨子墜水河中戲似

不因吾子將身試
誰識沙河幾尺深
抖擻山中塵
未了更勞冰雪洗衣襟

偶成

不知出塞年多少
眼見兒童盡長成
却憶故山諸老宿

那能白髮耐清平

獨立

直看前山仰看天不知何故淚如泉
若論生計真逾分知足于今二十年

山月

夜寒寂寂照冰顏巖壑無心戶不關
明月也知山上好莫教清影落人間

大雪

去年雪大今年熟今年大雪復漫漫
老僧喜極情逾怯一番來下一番寒

寒

重裘仍舊怯衣單行道何曾泣路難自是病夫禁不得
不關冰雪迫人寒

冬前一日卽事

忽聞城裏有書來三讀書題不敢開但得寒冬無事過
何須翹足待陽回

至日

去年此日身栖雪今日依然雪裹身歲歲盡傳陽已復
何曾一線及流民

千山詩集卷十七

博羅剩人可禪師著

書記今羞編

七言絕三

曉鐘二首

夜寒愁思獨紛紛
夢入浮山幾片雲
清曉無端一百八
數聲猶在舊鄉聞

曉鐘敲動未開關
山鳥驚飛不出山
一任穿林還度壑
莫流餘響到人間

暮鐘二首

壁燈談短冷颼颼獨坐無人未覺愁忽聽山鐘簷際落
一聲聲直到心頭

半窓如水夜魂清總是山寒夢不成何似耳邊聲歷歷
煩君直響到天明

卽事

雲傍青山却避山青山對面隔重關始知漁父良多幸
暫入桃源不等閒

孤吟

暮林鳴噪各紛紛絕頂高歌和白雲祇恐數聲漏崖谷
又隨飛雪下方聞

山中

山中習靜共忘機
人懶開門鳥懶飛
縱過河東知不遠
板橋常帶夕陽歸

二十七日虎至廚門

濕盡枯柴雪滿天
山廚昨日已無烟
眼前病骨今如此
知爾難垂一點涎

偶成

卒歲山中一病夫
寂寥已拚此生孤
獨憐此外茫茫者
不飲山中水半瓠

寄訊僧住

少小孤寒實可憐長成猶有蠹殘編前身野衲應留誓
不睹人間作業錢

道傍塚

舊塚低平雜草萊可憐新塚又成堆他年化鶴歸來日
不見累累那得知

古怨

花飛到地枝難上河流到海水難還蓮子落泥心尚苦
湘竹成簾淚尚斑

卽景

山山樹樹何皎皎四顧人天一色清只有烏鴉瞞不得

枝頭數點最分明

丁酉生日二首

重復生身一十年
嶺梅江月總生前
如何只說前生話
不分關河白雪天

總是刑餘更莫嫌
嚼窮冰雪味真甜
每因生日知年近
又得浮生一歲添

解嘲

夙生原是中
人嶺海遷流四九春
已幸還鄉踰十載
黃沙點點舊姻親

臘八

畏寒誰復睹明星破寺柴門手自扃負屈以來經廿載
任教風雪夜冥冥

懷華首臺

臺高容易動相思歲暮應愁塞上兒想得東溪溪石畔
梅花須發斫殘枝

懷栖賢寺

破寺殘年幸不孤幾人燈下共圍鑪不知五老峯前雪
得及天山一半無

懷還山諸子

去歲雪中談歲暮只今歲暮夜空長縱然未到家山去

一路梅花也自香

懷江南

靈谷無松虛夜月臺城有草照青燐多情最是秦淮鼓
夢裏聲聲到海濱

憶庾嶺

嶺頭一步他鄉路夾路梅花送馬蹄却恨當年輕踏過
如何不信鷓鴣啼

憶鍾山

鍾山野草恨茫茫寢殿無人只有霜谷裏長松三百萬
枕邊猶自鬱蒼蒼

憶曹溪

滿界螢飛說是燈溪河半滴飲何曾肉身縱在腸應斷
既哭蒼生又哭僧

憶浮碇岡

浮碇岡頭失敝廬空傳故里是尚書人民城郭全非舊
只好榕溪水自如

憶雙栢林

雙栢林中古佛居東官城外血成渠于今縱到無尋處
更有何人讀舊書

憶古松堂

門外鸞溪面面山古松正對第三間只今縱到翻經處
松亦蒼顏我老顏

憶白鶴峯

東坡去後鶴峯寒遺像空瞻廟又殘見說合江樓尚在
何年重上淚漫漫

憶黃花堂

三畝離支一畝塘長松千尺列成行主人猶自不歸去
野草空餘薜荔牆

山路

山下溪橫截行路半水半水馬不渡山人難見聲難聞

日暮微鐘出白雲

對鏡

波瀾盈面雪盈鬚問是何人道是予却喜此生應久沒
尚從鏡裏見須臾

閒步

歲窮無奈得閒何扶著孤筇儘著歌步到橋頭霜有跡
無人應是鹿來過

月下懷赤公

月光如水洗虛空人在城西金碧叢一自龍天推出後
何曾隻字到山中

心公以桂花糖寄山中

十載桂林消息斷何緣
花氣滿烟嵐春來定借維摩榻
金粟如來許共參

慰病客

身如浮沫命如烟
老少繇來別後先
莫怨他鄉歸不得
人間處處達黃泉

謝別僧招

隻杖無心過別峯
朝朝暮暮幾聲鐘
細思最得便宜處
長占崖西一樹松

又題一粟齋

珠闕瓊宮也太區十洲仙路枉馳驅祇今一粟寬如許
翻笑當年掛一壺

遙哭一門師

千羣野鹿伴閒身十里長松舊主人松已爲薪鹿爲腊
爭教破衲不成塵

重接亦非兄札

十年兩度寄書來脊骨猶存鬢已摧好水好山應歷過
肯將孤杖指荒臺

早起

殘星在戶月盈堦獨起披衣踏草鞋料得城中人臥穩

蒙頭敝絮掩空齋

慰老僧病

眼看幾日春將至
向道殘年病可哀
未到百齡何足慮
獨憐彭祖已成灰

送成空下山

誰道居山無限可
青松白雪總堪哀
生生只願檀那笑
且向城西第二臺

懷恰好禪人

年年約我來山住
我到山中爾又行
想得醫巫閭上雪
也將檟柮自燒鐺

寄恥若禪人

雖依城郭亦山林塔影河流足好吟況有異方新弟子
何勞重話祖師心

夢匡廬

驚回溪路一聲鐘夢入匡廬第幾峯似向開先橋上過
輕雲半覆六朝松

月

一半著雪半映書月來偏向山中廬如何不照城中路
曉夕茫茫無緩步

念舊

對影高歌又一篇一篇歌罷一淒然子期死後琴聲在
流水高山自歲年

喜恰好禪人還山

未過溪橋笑語聞紛紛驚起暮鴉羣雙睂已掛家山雪
猶帶巫閭幾片雲

暫入海城還山

入城半日便思歸歸到山中日亦暉人世幾時忙得了
幸然忙不到巖扉

哭金居士

匆匆策馬入山來一宿山中便欲回早識黃蘗無返路

何如煮雪共山隈

偶成

歲月盡從忙裏去幸因抱病得閒過
燈前細檢無餘事手自焚香對佛歌

除夕

燈影幢幢炭已灰山頭無月暗相催
年光一向難留住恰似老從今夜來

寄呈本師和尚

稽首華臺大法王年來孤錫指何方
不才弟子今猶在却向關東雪辦香

聞浪大師信

曾把三緘戒鄙人如何无妄及其身莫爲相憐情較切
個中甘苦獨嘗親

贈妙法師

杖頭曾入帝王家合國同瞻又釋迦歲歲談經今幾會
佇看舌本長蓮華

贈碧庵師

時方掩關

一坐柴關已十春衲衣曾不惹纖塵山空鳥寂無人到
獨有予來不厭頻

贈了望師

雙眼矇矓手一編趙州雖老志彌堅直須會取聲前句
不負人間八十年

贈德悟師

一把枯茆百仞山殷勤何意扣禪關須知十萬西方路
只在尋常杖策間

贈慧虛師

白髮飄飄似鶴形每因多病得身輕日長睡起無多事
一串菩提一卷經

贈大莖師

如何萬里亦孤身歷盡豪華不厭貧越水吳山無限好

却來塞外漫相親

贈印真師

閒窓飄雪共徘徊
羨爾英年出世埃
盡道長安風月好
一瞻瑞像便歸來

贈心菴師

昔日牛頭山上老
朝朝暮暮爲誰疲
人生七十尋常事
心行如君自古稀

贈寂庵師

日高三丈各安眠
早起何人獨灌園
須信祖師真的意
元來只在轆轤邊

贈崑璞師

草鞋終日爲人忙瘦骨真同百鍊剛處處現身爲說法
須知別有好商量

贈守心師

師有子顯真
藏主高足也

却因羸病息塵機兀坐經年半掩扉賴有佳兒供菽水
舞斑仍是舊田衣

贈澄心師

閉戶長翻五部經魚聲應有鬼神聽幾番剝啄知予到
自起燒茶話月明

贈淨如師

何須看教與參禪
運水搬柴做昔賢
萬行盡從勤處滿
西方曾有自生蓮

贈瑞字師

百草曾嘗一老僧
殷勤長禮藥師名
夜深七卷蓮華後
重剔寒燈讀內經

贈一真師

瑜珈習後學毘尼
土榻蒲團日掩扉
十誦從今須細討
莫教辜負水田衣

贈寧波師

海岸狂飈不暫停
十年波浪幾曾寧
安禪可把毒龍制

萬里長空一色青

贈正修

如何年少髮先斑
問道時來扣竹關
世上知恩誰得似
而師幸白慰衰顏

贈壽績

身在山中不見山
遠隨虎跡度松灣
野橋斷處嵐烟盡
依舊泉流白石間

贈淨虛

閒雲飄盡爾還留
萬里長江一葉舟
風靜波停山月小
碧天如洗夜悠悠

贈盛公

幾向燕然勒石銘
龍泉猶帶血痕腥
只今放馬桃林去
獨對閒僧問佛經

示純徵

庭前栢樹事如何
日日披衣聽法螺
選佛有心空未得
祇因鄉夢近來多

示無味

曾藏大巧貌如愚
終日勞勞未覺慵
收拾饅頭閒一枕
祇應蝴蝶共歡娛

示蘊珠

年少如何學懶殘而師恩重似丘山但能盡孝名爲戒
洒掃堂前慰老顏

示密訓

白髮庭闈近佛圖彩衣舞罷學驅烏英英謾道年方少
出世居然大丈夫

示非浴

一鉢閒僧爾獨依殷勤莫負好春暉遼陽那得楊州鶴
自向晴窓補衲衣

謝易修師爲染衣

檻穽雙袖淚痕乾何意偏憐范叔寒一榻雲烟分半席

長宵擁毳共團圓

謝與樂兄贈藥

祇因貧病易相憐
清淚頻揮白雪前
大馬殘生偷旦夕
何須藥餌更延年

喜耀宗受具還

羨君忙裏自閒閒
雙袖蹁躚亦度關
不識長安行樂地
三衣明月一肩還

寄淨玄師

如何一去更無音
皓月相期空有心
爲問田中禾熟未
西風索索漏沉沉

爲躍海師易號

金鱗不見自徘徊幾向洪波擲釣回三月海門看汝躍
桃花浪裏一聲雷

普濟寺

到此都成選佛才嵯峨高閣倚雲開關東處處精藍布
那得摩騰經卷來

賀藏主師新築

築得幽居典却衣土牀茶竈廠荆扉白雲自許時來去
不放紅塵一點飛

謝諸檀越

龍藏多年始一開菩提無種大家栽應知此會非今日
共向靈山付燭來

贈田居士

子道如君孝獨全逢僧便解杖頭錢從來福報徒干劫
莫遣宮成第四天

贈曹居士

一室蕭然佛作鄰長齋惟與老僧親祇因世事難開眼
一卷詩書付後人

贈耿居士

世外情多見爾偏紅塵終日自仙仙家中時有閒茶飯

但見僧來不問錢

贈毛居士

塞外逢君見所親
壁間長掛一壺春
莫嫌混跡塵埃裏
相識全歸世外人

贈戈居士

六祖當年不識丁
金剛一句便回程
而今一卷從頭誦
猶自深更愛聽經

贈李居士

本來面目無文字
執卷何須問老僧
愛汝清貧偏好學
寒窓風雪對孤燈

慰桂居士

明知是幻復何憂
生滅從他海上漚
竹院相過應不遠
何妨竟日爲淹留

贈智輪道者

法華轉罷讀皇經
仙闕依然傍佛扃
鍊就丹砂堪作供
鶴衣長舞法王庭

禮雪庵祖師塔

孤留石塔鎮千山
想見當年冰雪顏
身後能來天子詔
更無一語落人間

送居士省母

望雲幾度淚沾衣此日長邊一雁歸兄弟團圓歡共舞
莫將風雪訴庭闈

懷堡中左氏諸兄弟二首

塙麓應向雪中吹猶喜城邊見左思料得鵲鴿原上淚
未曾秋到已先披

弟兄何處采山薇白雪空多豈療饑頗恨年年沙上雁
秋來偏自向南飛

懷戴公

共是冰霜一見難新詩猶得寄禪關月明乘興來相訪
又恐途中興盡還

戴公以湖筆松茗見寄賦謝

夜鬼年年哭未休江郎五色漫相投思君此日情方渴
自煮新茶老趙州

戴孝臣從堡中來訪四首

憶昔相逢古佛家今朝何意共天涯莫將遼海三冬雪
去比江南二月花

祇因舞彩換袈裟曾見圓通老作家寒雪一瓢應羨我
何時重馭白牛車

但將菽水慰而親自在塵中不惹塵不見當年盧行者
獵人隊裏易藏身

倚閨雙眼望邊城
忠難應添舐犢情
歸去穹廬風雪際
團圓正好話無生

送藏主師遊長安二首

去年匹馬度重關
除却經書兩袖單
此去長途風雪際
殷勤爲囑好加飧

長安簫鼓鬧聲喧
料得君遊自晏然
一見故人便回首
舊山明月待君圓

寄山木師

不結人間一面緣
平安兩字仗君傳
而師定有江南信
莫使寒烟望眼穿

寄胡居士

舊疏重題識姓名老僧何意重君平
英雄定有無端淚不是偏多世外情

過寧遠

此地曾開細柳營荒臺空見草青青
祇疑一片城邊石猶有當年舊勒銘

望醫巫閭

一片晴雲萬壑閒行人立馬自開顏
風沙此際還留勝豈必羅浮是故山

懷嶺南

雙淚紛紛灑大荒
弟兄叔姪轉難忘
不知嶺海風波後
若個猶存若個亡

懷華首

山中兄弟幾人留
料得堂前草已秋
欲把尺書憑雁足
又愁飛不到羅浮

懷匡廬

鸞溪溪畔歸宗寺
松下何人尚掩扉
聞道幾峯雲散盡
祇應如舊瀑花飛

懷白下

欲寄音書道路長
霜風驚夢思茫茫
惠州此日真天上

却望江南是故鄉

懷顧家樓

幾年掛錫石橋頭屋角梅花盡意留多少幽人尚翹首
可憐明月下前樓

立春日

城郭依然古殿閒人民去後剩青山山中有雪猶堪嚼
何用春風度玉關

燕子

春盡枝頭始見花風流何處委黃沙尋常百姓今猶少
飛入清寒古佛家

三言詩集

卷十七 七言絕

大

開原

或云卽五國城

頽垣荒草亂雲橫
野老仍傳五國城
欲擬招魂愁漠漠
何人能聽杜鵑聲

問石人

半揖低聲問石人
何年風雨臥荒榛
威儀恍惚猶前代
不識皇家制令新

答

一臥荒丘不記年
眼看田海變朝烟
老僧何事勞相問
未必君心似我堅

又問

見說當年此極邊
芊芊白草已連天
憑君莫話滄桑事
只恐愁多石也穿

又答

無情久矣學枯禪
話到傷心我亦憐
骨勁冰霜雖已慣
不禁秋雨泪漣漣

三官廟

張公舊住處

宮闕崔嵬近大羅
雲裾瓊珮老仙多
瑯璈奏罷星辰隱
永夜如聞不二歌

訪華表

人民城郭盡皆非
鶴去千年更不歸
惟有只今遼海上

一年一度鴈飛飛

自題小影

衲衣一寸馬蹄塵多難還餘未死身
直看古來橫看世更將此事委何人

接亦非書

兩片雲飄各不知忽聞萬里話相思
開緘看取行行淚多少胷中不盡詞

千山詩集卷十八

博羅剩人可禪師著

書記今羞編

六言詩

月夜雪齋同諸子賦

奇哉吾輩猶在絕域從他歲徂一片月明盡看三更霜
白重鋪但能談笑無倦卽與家鄉不殊城曉鳥啼客散
天高磧冷僧孤

秋曉

一聲林際天白數點門外峯青昨夜雨來入夢今朝葉

落滿庭

秋晚

月始出林尚小鐘來越澗漸微且留半戶莫掩少待片雲未歸

山居十首

日日山嵐遶戶夜夜山風透籬日夜風嵐幾許問著山翁不知

破屋老僧兩個古木寒鴉幾枝前溪欲凍未凍有人橋上行時

仄徑積雪掃去枯椿瀾戶推開今早矮簷鵲報前山古

洞猿來

閒歌白雪幾句靜讀南華半篇無人遶樹數匝有時欹
枕孤眠

乾葉亂飄屋角枯枝橫柱籬邊誰道山居閒暇初枝掃
葉燒泉

野鼠每投案下小禽近訴窓前卽此是亦爲政山中無
黨無偏

雲封八九十層松蓋百千萬尺塔頂一雙鷄栖溪邊兩
行虎跡

溪長水去無歸戶淺雲來直入老僧手把鑊頭口道明

年九十

剪藤縛木依崖鑿石引泉入屋結構不俟歲時經綸已
遍山谷

出門不過數里前邨獨自一家二老見人必笑山梨山
棗山茶

千山詩集卷十九

博羅剩人可禪師著

書記今差編

雜體

譯鳥言七章

行不得哥哥世無商王誰開網羅

鷓鴣

都惡都惡不如沙漠沙漠有冰猶可啄

杜鵑

得過且過身無毛夜無窠誰能留白日莫使下滄波

寒號

鵲惜惜多少新民不得食

鵲

呀呀呀安得大日輪照此海東涯

鴉

姑姑姑一月三夫舊夫瘦小新夫羸

鳩

快耕快鋤地霜多今不努力奈饑何

布穀

三五七言

塞草白塞日黃埋沙無老骨掛樹有饑腸
安得長風生此夕盡吹殘魄返其鄉

荅卽子寄水晶蟾

九載不相聞萬里勞相寄分明一照見
肝腸中間恍惚相思字

戲效讀曲歌體六章

辛苦道傍井轆轤無停時行路日千百
若個心相知

捶碎簷前鐘十年剛把手此別更難逢

揖謝簷前鐘幸渠話未終話終泣何窮

盤中堆紅炭炭熱人亦聚炭銷人亦去人去留不住住亦無意緒

炭熱盤不覺炭銷盤不知勸君且住不須去盤當再熱時

大雪不得食野雉馬前飛少年惜泥彈只用馬鞭捶鞭捶死亦苦其奈腹中饑

偶成

斫却相思樹鋤却金銀花世間自有好男子何必嘈嘈

老釋迦

槿言

槿之言若曰爾松太不情孤直千年苦何似一朝榮松
聞寂無聲便使爲薪竈下死不願開花世上榮

俗謳

海舶來海舶不來無剪裁

海舶來海舶不來飽難捱

博里歌

予博羅人也幼聞
里中歌偶憶其四

柰何許擔水放白艚到底克不去

噫於戲魚鰓著水交不固

休語語休言言扁柴燒火嘆無緣

苦瓜苦有時鋤儂心苦無時無黃蘗苦有時枯儂心苦
無時無若得儂心無苦時長河無曲路無巖

千山詩集卷二十

博羅剩人可禪師著

書記今羞編

冰天社詩

序曰白蓮久荒堅冰旣至寒雲羃羃大地沉沉嗟
塞草之盡枯幸山薇之尚在布衲毳毼匪獨杲長
老之梅州遠逐孤臣憔悴尤甚韓吏部之潮陽夕
遷珍重三書蕭條隻杖每長歌以當泣寧寡和而
益高蘭移幽谷非無人而自芳松植千山實經冬
而彌茂悲深猿鶴痛溢人天盡東西南北之冰魂

酒古往今來之熱血既不費遠公蓄酒亦豈容靈
運雜心聊借雪窖之餘生用續東林之勝事詩逾
半百會未及三榼榼漫題

同社名次

榼榼和尚

廣東人原住羅浮華首臺

北里先生

山東人

湧狂

千山僧遼東人

大鈴

醫巫閭僧浙江人

正羞

塔寺僧遼東人

希與道者

北直人

焦冥道者

北直人

寒還

陝西人

甦築

南直人

叫寰

陝西人

東耳

南直人

天口

南直人

兀者

陝西人

錦魂

浙江人

刺翁

山東人

光公

山東人

春侯

山東人

薪夷

陝西人

孝濱

江西人

小阮

山東人

阿玄

山東人

大頑

山東人

二愚

山東人

雪蛆

遼東人

水鬼

石人

尚陽堡十里人

沙子

大漢人

青草

塚邊人

狂封

朝鮮人

丁令

遼東人

子規

五國人

不二先生

陝西人

鎮君

醫巫閭人

社集詩

第一會北里 庚寅至前二日爲北里先生懸弧
之辰余首倡爲詩和者僧三人道二人士十六
人堡中寄和及後至者八人合二公子共得詩
三十二章

楹權

塞外高松青百尺淒風吹雨半天聲共經萬死知生重
却羨孤身似葉輕東海只今餘大老西山不愧是難兄
予生匪遠寒逾甚白雪同歌歲歲情

湧狂

短髮投荒又一年每逢山寺便留連
遠公自愛尋陶令吏部曾無識大顛
一片鐘聲和骨冷半邊月色可人憐
文章節義渾閒事何日還題到白蓮

大鈴

詩滿龍庭雪滿囊我來初沸竹爐湯
二雛將護人中鳳羣雁時驚磧上霜
豈爲觀瀾親海岸每于覓句到僧堂
蕭條野外無供給糞火煨芋好共嘗

正羞

竹杖方袍人不疑蕭然茗椀雪來時
枯桐未賣寧堪爨

古墨多殘足療饑已過虎溪難強笑欲投魚腹亦成癡
但將泡影看身世海角天涯月一池

希與

長携孤月論黃庭知爾身從去國輕一片骨留支雪窖
半牀書在卽雲城文章盡向青天問肝膽偏于野鶴傾
采得五芝渾不羨寒氷端自怯長生

焦冥

何人清曉扣柴扉不是閒僧定羽衣笑溢中庭斑共舞
談傾四座塵頻揮關門又見青牛度遼海今看白鶴歸
未有丹砂堪作供一觴聊取伴山薇

寒還

何人幽谷響丁丁共琢堅冰欲舉觥可見天心留不死
幸從雪際識先生談深今古青松塵閱盡滄桑楸玉杵
多少野人無別祝千秋莫負歲寒盟

題築

古來報國幾身完憔悴孤吟見淚漣未到投荒肝已烈
只今留息骨先寒鼎湖何處遺弓在敝笥仍餘舊綵單
臣子有心剛一寸西風淅淅雪漫漫

叫寰

一日相逢笑一回世皆欲殺是真才長歌東海濤千頃

共進南山雪半杯萬卷自堪延歲月九州真可付塵埃
當年縱爾開東閣那得幽人踏踏來

東耳

天下文章羨大家泰山今仰海東涯冰清本是人中鑑
雪滿還疑縣裏花有子傳經看舞鳳無枝繞樹歎飛鴉
春風尚洒傷心淚又聽寒吹日暮笳

天口

古今斯道足長吁遺老流民共一圖磊塊時堪澆五斗
荒蕪那復賦三都幾回欲立程門雪此地仍逢魯國儒
共是傷心愁日暮茫茫何處哭蒼梧

兀者

泰山千仞望嶙峋幾度從遊得所親足似申徒師忘我
家無原憲病兼貧居夷且喜依君子學圃何妨是小人
白雪霏霏天漠漠一罇四座忽同春

錦魂

愁雲紫氣滿關東無數頑民獻壽同眼底河山三盞內
世間日月一杯中懸弧豈必皆男子嚼雪今看有鉅公
愧我不才花筆在追陪長共笑虛空

刺翁

小雁城邊大雁邨邨中尤覺雪霜繁饑來却憶周人粟

寒極難吹伯氏墳骨肉幸餘心已碎詩書無用卷猶存
一觥盡注鵠原淚慚愧空空北海樽

光公

多難相依有弟昆驚魂未定又離羣歲寒尚喜留蒼柏
夢去還疑到故園但覺冰堅沙淚結俄驚詩縱海瀾翻
不堪讀至傷心處老鴈無聲只自吞

春侯

魚網同罹鴈一羣邊城飛過雁羣分遼陽尚有歸來鶴
五國惟看就死麕忍餓吟傾三斗淚相思望隔幾重雲
清泉遙酌冰方結寒雪和魂白到君

薪夷

高名久矣仰山東何意流離一識公下里幾能賡白雪
寒天猶得坐春風節旄旣落心逾壯詩卷猶存道未窮
欲與斯文慚後死一芹聊與野人同

孝濱

慷慨孤臣彼一時餘生終日戀庭幃君親欲報倫俱大
忠孝貪全事已非阿弟已隨滄海變大人又向玉京歸
應知夜雪穹廬夢猶自聯翩舞綵衣

小阮

大阮猖狂小阮癡到邊仍自共論詩每經雪壓蒼松幹

常護霜摧玉樹枝
蜡日未能華氏燕
東山猶有謝公棋
羊皮舞罷偷捫淚
只恐高堂見又悲

阿玄

出塞無殊聚故園
一家骨肉黑雲屯
叔癡不在山濤下
兒餒終憑郤鑒存
偏愛覆巢猶有卵
却驚大漠亦開樽
聞詩久欲偕諸弟
只恐風霜獨倚門

大頤

朝來旭日起東溟
多難驚看兩鬢星
半菽尚堪供雪窖
敝貂時共舞龍庭
駒隨櫪下慚千里
金盡篋中剩一經
但願椿萱寒更茂
冰霜長伴八千齡

二愚

知年何處問堯蓂但覺年來鶴似形玉樹堦前渾是雪
老人天上見爲星參苓亦可延寒歲詩禮時聞過朔庭
欲效伯兄齊獻祝千年松柏似青青

雪蛆

當年亦自悔懸弧欲射四方亦枉圖半刻山河惟裂眚
千秋殺活在枯鬚祇應兎管天心見恨不龍泉頸血枯
想得玉京時一笑存亡生死總同途

冰鬼

豈特文章世所宗寒天惟我論心曾不容然後見君子

請學何妨是老農大雪自應持漢節高松寧肯受秦封
最憐門下餘窮鬼此外仍多野鶴蹤

石人

相尋兩度忽相思白社重開敢後期司馬門前寧曳履
泰山頂上尚留碑補天可是終無術柱國真憐獨莫支
剝盡赤脂元少肺煮將肝膽佐寒巵

沙子

漠漠風生莫浪嗟潮來曾共泛仙槎摘詞欲奪清溪錦
學道真輕白馬牙最愛一篇懷屈子何煩千粒擲經家
饒他鬼蜮能含射影伴鷗閒到海涯

青草

一叢寂寂自埋香
願上裴公綠野堂
却喜疾風知勁草
肯因寒雪損孤芳
垂條不學章臺柳
粧點全如蘇子羊
近日禁中無可視
暫隨詩句入奚囊

狂封

黼皐曾將付子孫
只今風俗未成髡
采薇已見叔齊死
抱器何妨微子存
三代禮儀求在野
一篇洪範道仍尊
華山此日難歸馬
雨雪淒淒不可言

丁仙

衣白山人歸故鄉
只今洛邑是遼陽
携將別島峯頭月

來佐前朝雪底觴
浙浙西風千古淚
壘壘高塚一天霜
世間甲子空三百
只恐重來社又荒

子規

今時人共昔時人
五國千年更不春
流落殊方連骨肉
淒涼異代足君臣
乾坤易換啼難盡
江漢空流血尚新
不見只今愁更濶
西湖珠海總荒榛

不二

泪作洪波氣作潮
縱枯到底亦難消
君來我後事逾烈
死比生前恨更饒
自昔在心惟向北
只今無日問同朝
湘沅魂散江流細
大海茫茫何處招

鎮君

昨日今朝憶舊封五臣瞬息走寒風雲愁霧結攢眉頤
嶽動山傾擲筆中正直難容吾幸在聰明速禍爾方窮
茫茫總是羣生事天地繇來尚未窮

北里

答諸公見贈

神農虞夏忽蕪荒五十五年事杳茫絳縣春秋羞甲子
楚歌宋玉譜宮商腐儒不死蠹空在竄客添齡罪愈彰
松柏好存冬日色任隨漚沫注滄桑

第二會搥捶 賤辰承搥捶大師率諸公賦詩投

贈至後五日卽師一手指天之期予作頌諸公

和者亦如前數

北里

去年已見西方曙今歲仍親大海瀾
片月人天隨竹杖慈雲忠孝一蒲團
旣窮震旦三千里又想堯墓十二看
劫火常留多佛塔蒼生灰燼共盤桓

湧狂

土牀閒坐啜黃齏得句時翻經背題義
膽久拌沙暴骨禪心不學絮粘泥
難期蘇子看羝乳長伴支公聽馬嘶
塞外無花拈雪示何人微笑各淒淒

大鈴

終年長許傍孤筇，翹首雲飛第一峯。
瓶汲幾乾湘水浪，魚敲欲起鼎湖龍。
旣收殘骨埋花雨，又召遊魂聽雪鐘。
五嶺三山當此日，清泉共酌祝寒松。

正羞

枯將寒瀑問吾師，華首仍餘未斫枝。
十丈青蓮半櫟矢，一腰白雪兩莖眉。
已知佛椀燈爲火，那見人間沙作糜。
得髓及皮子是石，不知瓦鉢付阿誰。

希與

亭前栢樹子青青，風雪當年恨獨醒。
縱死兩間留正氣，纔生四月睹明星。
談經聽去人爲石，乞食歸來月滿局。

却笑詩篇成罪案新題今又遍龍庭

焦冥

百鍊曾經骨愈堅孤身迢遞出長邊死生既了人倫繫
忠義仍憑祖道傳枯寂無心時咄咄毳毼破衲亦翩翩
丹砂欲作如來供只恐如來不羨仙

寒還

采薇直上首陽巔好供人間忍辱仙刀鋸尚能餘白足
冰霜依舊長青蓮苦將杲日留方寸笑把微塵擲大千
安得我離煩惱早朝昏長禮法王前

甦築

羅嶽飛雲杖獨登天山積雪更峻嶒英雄古佛來寒磧
節義文章屬老僧一寸丹心三寸舌千家香飯五家燈
猊烟縹緲天龍擁如此投荒見未曾

叫寰

忽聞獅子吼空林幾度來叅白雪深松塵頓令頑石起
蒲團長有野雲侵仍餘點點人天淚未了纖纖俠烈心
何日佛容爲弟子免令朝夕費相尋

東耳

擲却吳勾久不看烏藤七尺斗牛寒心經雪窖何曾冷
泪到空門總未乾妙喜多言五嶺遠蘇公好咏一生難

靈山不及西山會薇蕨優曇作是觀

天口

先子遺文付弟昆辭家久矣托空門杖頭欲豁天人眼
筆底先招忠義魂身世肝腸傷半碎乾坤風雨冷全吞
田衣淚漬緣何事到死知君不哭冤

兀者

飄然孤錫淚如麻爲憫寒邊老作家漠漠黃沙成佛土
紛紛白雪散天花傳燈尚欲留三代說法時兼演五車
天下衆生余最苦迷津憑指海東涯

錦魂

世間兩字是君親明白輸他世外人自是傳家無二道
猶聞報主有孤身到邊已作開荒主先代曾爲柱石臣
見說佛慈原等視巨航普度盡頑民

刺翁

大漠飛沙白晝昏肝腸碎盡骨空存龍髯天上悲難挽
魚腹江中冷欲蹲半縷髮餘思學佛一林霜滿歎窮猿
禪宮亦自淒淒日况是人間可復言

光公

投師無計托空門短髮蕭蕭淚獨捫荷芰已殘曾可製
木魚雖大不堪飧頻年無復知生樂此日空餘見佛尊

但願梵音清切處晨昏或可召冰魂

春侯

惠州天上舊知君救世才猷壽世文累代箕裘全與弟
千年鐘鼎薄于雲天傾不覺袈裟動鬼哭惟餘拄杖聞
此日此邊相憶處盤冰一覺淚紛紜

薪夷

不羨人間布地金蕭然破衲冷風侵家山應自添新夢
塞雪真堪助野吟何必盡留文字障定知難解友朋心
寒齋幾度勞飛錫日極千尋黑浪沉

孝濱

十年前現比丘身舊習難忘下筆神心史未能藏古井
新詩直欲問高旻誰知濁世佳公子便是湘江老逐臣
海畔行吟時說法人天八萬盡霑巾

小阮

曹溪久矣羨南宗何意今來北塞逢
菽水難供思托鉢
雪花初下忽聞鐘
重開白社吾將往
又恐黃塵佛未容
翹首城南高座上
寒氷千丈冷芙蓉

阿玄

何緣此日得逢渠
竹院閒過飯一盂
遷史腐刑孫子刖
瀉山水牯趙州驢
餘情未剖貪成佛
大義難忘每讀書

却笑鍼錘終未惡又容饒舌到荒墟

大頭

三尺穹廬僧作鄰不嫌托鉢到門頻猖狂普化重來世
憔悴靈均是化身却怪愛君偏野老須知選佛亦文人
趨庭每許聞新句自覺寒邊日日春

二愚

門前竹杖破莓苔木佛燒殘志不灰未喪斯文留子在
欲聞大道喜師來父兮每咏驚新和伯也前驅愧後陪
料得夜寒猶有夢鄉情端在嶺頭梅

雪蛆

野鶴何天不可飛時同寒雪共棲遲火風劫盡身仍在
西北天傾杖欲支不愧先公真肖子元來出世是男兒
死生知罪渾無涉却恠年年只有悲

冰鬼

乾坤納納一身孤出世分明大丈夫松栢自堪凌塞雪
菩提終不怨秋荼從來罪案漆洪杲始信宗門有董狐
青史傳燈無二事笑他枯衲與迂儒

石人

又見生公冰四圍頑心如我足相依痴猶研雪從添罪
妄擬炊沙爲賑饑一世心腸頻看雪大千勲業在披衣

纔枯白骨天龍慘花雨紛紛帶血飛

沙予

昔年西度到神州此日漂流伴海漚久擲紫金成糞上
肯隨黃石傍山丘江河可是終難塞鳥篆從茲正好畱
請看只今堤上築何如撒手大潮頭

青草

一寸芳心自不同幾偕松菊傲霜風窓前自許依周子
溪畔長宜揭遠公已愛社中蓮辦白肯隨馬上石榴紅
當年錯恨丹青畫今日方知色是空

狂封

何須八百興亡商滄海由來好變桑天運欲窮無大雪
野人先自學狎狂幸將斯道留孤杖猶喜拈花到外方
白馬若能先漢至袈裟定作老僧裝

丁仙

山前華表雪風寒縱有千年泪不乾衛國乘軒看若夢
青城飛矢避應難翎輪蓮瓣三分白頂共君心一寸丹
城郭已非人尚是可能騎我海天寬

子規

日暮悽悽向北鳴如何天事總難明最憐枝上三更月
照見人間五國城十二金牌恨未了一條竹杖淚方盈

血流滿地君休聽古佛由來亦有情

不二

不二歌殘天地沉感君霜夜一孤吟幾年但食僧堂飯
到死空餘故國心曾學雙趺惟一面每聽清梵亦盈襟
只今滄海愁雲裏除却蓮花總不禁

鎮君

老僧本是山中住一出山中事便多魚鹿縱應勞短策
蝸牛何必用長歌骨頭欲比巖巖石意氣仍留浩浩波
從此極巔供陟降青天咫尺手堪摩

搥搥

答諸公見贈

刀俎遺餘生久殘漫勞諸子摘琅玕春風沙磧驚新至
臘月盤冰好共餐萬里鄉關三歲夢七觔布衲五更寒
淹留竟日歸須晚只恐重來事又難

招諸公入社詩

諸公答詩附

招不二先生

三扣先生知不知殘僧亦有膽堪披蓮花一瓣歸來好
上帝年來只掩扉

不二答

何意相尋到海涯袈裟微動我先知帝閭縱扣原無益
只恐空門亦有悲

招雪蛆

永作肝腸我作鄰
愛君清冷絕纖塵
死生欲子三冬事
只恐寒消不耐春

雪蛆答

天地高寒一世
人對君如水
話應頻死生
總是須與事
猶幸長邊不見春

招青草

一寸青青自耐霜
茂陵驪嶽總茫茫
黃塵不獨埋紅粉
社裏蓮花比爾香

青草答

紅粉消沉恨獨長
千年曾許伴寒霜
遠公一去君今到
那見蓮花日日香

招子規

乾坤千古總糊塗
何事年年帶血呼
只有蓮花歸處好
鳳凰山上亦荒蕪

子規答

千年痴恨在西湖
無奈啼多血亦枯
木佛已燒山寺冷
不知蓮社久長無

招狂封

三韓總是爾封疆
黼黻能留只一方
洪範遺編存布袋

歸來別有好商量

狂封答

國家拋盡話倫常只道余狂爾更狂
三子西山居不遠待來携手到僧堂

招水鬼

白水青波是舊身夜深惟許爾相親
衲衣一片寒侵髓不久當爲若輩人

水鬼答

雪是家鄉月是鄰閒來偏與老僧親
卽今便是吾儕輩談到當來一點塵

招丁仙

歸來莫羨海天寬
眼見天傾海亦乾
從此社開時可到
千年那得一人存

丁仙答

到處孤雲共一間
彌天風雪骨毛寒
杖頭已了無生話
一日千年作是觀

招石人

松塵招來好論心
憐君獨自立高岑
攢眉欲去非關酒
只恐愁多抱爾沉

石人答

其爾沉江我亦欣相從終不了頑心笛聲未聽肝先烈
惆悵當年直到今

招沙子

大地茫茫一聚塵我來撲面爾先迎他時片骨知堪托
莫使沉埋見月明

沙子答

聚散由來不可論大千佛土總成塵黃泉亦是安身地
何事偏于白月親

招鎮君

聰明正直亦前因五戒曾聞授獄神我到冀營君是主

淨除庭雪待風輪

鎮君答

古廟禪房近作鄰
燈光長與法王親
塵揮每逐天龍後
白社偏勞問主人